

Folo yana leta EFESO tovetumagana agaidiya

Folo Loma deliya gimiyami tu leta fowa gi'etoladidi, higa tovetumagana adi yo'o Efeso Filifai Kolosi agaidiya kadu sa'eyana bana Filimoni againe. Hida miEfeso yadi leta gi'etoladina be higa nagona miEfeso hinahawana tu muliya ekelesiya melala tulina tulina agaidiya leta ginanuwaliliuga.

Efeso melala kikaiwabuna Esiya ana fafaliya. Moya'aidi lukimokimone againe hihawahege-mo'edi, ada yadi viviluwa kwamayoku Atemisa, ana egana velugana Daiyana, yadi manuwa- tafalolo lakahi-mo'ena gavavewaga Efeso againe gidauda. (Afositolo 19:27)

Folo yana lumamala-waliliuga anavelu againe Efeso againe sabati sa'eyana miYuda giluma-maledi. (Afositolo 18:18-21) Tu yana lumamala-waliliuga anaveto againe Efeso againe gimiyami givehavehawala malamala tohiye. (Afositolo 19)

MiEfeso yo'o tulidiyao kalivai-dina tu kadu miYuda tufoidi medede againe himiyami. Ada hida leta ana nuwanuwa lakahina ma Keliso miYuda kadu yo'o tulidiyao gi'ivesa'eyadi, higa tova adamoya ide gaveyao Keliso buye kave'atutamo'aida medema ada yo'o sa'eyana. Folo ekelesiya gaitoma tohiye agaidiya giluvefosed, higa ide Keliso wowona tu Bana u'uda, kadu ide yana manuwa-mo'ena tu Bana manuwai-nadi ana holili'abi, kadu ide vaita

vavinena amine tu Bana moganeda. Leta dobona hidede amine.

Lusiule. 1:1-2

Yaubada yana nuwadoga kadu Keliso be ana tovetumagana yadi ve'atutamo'aina fa'ina.

1:3-3:21

Tovetumagana yadi nuwanuwa sa'eyana hinamiyami. 4:1-16

Dewa uyu'uyuyuna hinavenikohiyena. 4:17-5:20

Bona'abi ve'ahawahawahega adi yo'o hinagediya gilubodadi. Kaliva wavavinena

5:21-23 We'owe'o 6:1-14 Agetoga 6:5-10

Keliso yana faiwaleya Setani ahenao hinalugaviyadi. 6:11-20

Lukafoi. 6:21-24

¹ Yo siule tobohiyakweyao moya'aimi Efeso againe. Iya Folo Yaubada givegideku be Yesu Keliso yana kabu gavaina, higa yana afositolo adi maka giveleku. Omi Yaubada yana yo'o mahamahalimiyao Efeso againe yami leta ga'etoladina be wana'itana. Omi higa Yaubada yana kaliva yana vevine mahamahalimiyao kadu Yesu Keliso againe wahawahegemi be wamiyamiyave'avina. ² Yaubada Tamada kadu Kaiwabu Yesu Keliso hinanuwadogemi kadu ase'ase mi hinakiveniwalovina.

Yaubada yana vevai ide Keliso buye kave'atutamo'aida-ma

fa'ideya.

3 Bana'e yada Kaiwabu Yesu Keliso yana Yaubada kadu Tamana amanadi kanahawadavadavana. Fa'ina lobama ana lokolokofou moya'aina alu'aluwada yana miya hagiagina fa'ina gihawahegena be ide Keliso buye kave'atutamo'aida-ma ginuwadogeda. Yaubada hidede amine ginuwadogeda fa'ina kanadavadavana. ⁴⁻⁵ Boi tuwai-lokalokana aimo babi keke gidabubuni ana toveya, Yaubada ide gaveyao Keliso buye kave'atutamo'aida-ma ahe giluwapada be higa mahamahalideyao kadu keke ada wavita Bana matane kanamiyami. Ada nuwakabubu fa'ina tuwai-mo'ena givegide-vagahida be Yesu Keliso yana ihagihagi againe ide Bana natuneyao amine ginafayayeda. Bana Tauna yana inuba hagiagina fa'ina, au hidede amine givegide-vagahida be higa ginahawavenatuneda. ⁶ Mena yana nuwadoga lakahi-mo'ena againe ide Bana Natu'ase'asena buye kave'atutamo'aida-ma ginuwadogeda be higa Bana ana egana kanakilakahina kanagayo, “Ho Yaubada, ya nuwadoga keke kanawona!”

⁷⁻⁸ Tu ide Keliso buye kave'atutamo'aida-ma ada aiyauga kanuhagana. Yada dewa koyona fa'ina yogoyogonideyao kamiyami tu Keliso dayagine gitutuehobuda, higa yada koyona ana laufata Bana giseni tu Yaubada yada koyonai-dina giyawelidi. Mena ada tutuehobu ma yana nuwadoga lakahina ana iya'iyaya, ada au yana nuwadoga ide agaideya givetalaiyena-ma gavatubuga! Hidede amine ginuwadoge-mo'eda be nuwahuya tulina tulina kadu Yaubada ana halamana againe kawahivemavemauga. ⁹ Boi

tuwai-lokalokana Yaubada Tauna nuwahinagene ginuwanuwa be givevai, ada mena yana nuwahinage boi sevasevauyana ma ide agaideya gihawavemogatalena. Bana Tauna yana inuba haghagina againe Keliso fa'ina givevai. ¹⁰ Ada yana vevai hidede amine. Yana aibubuna matatabuna tomiyalobama kadu tomiyababi ginavaga'auhida-yo kanavesa'eya be u'uda sa'eyana, higa Keliso. Ada gaitoma moya'aina adi aituha hinaluyabuna be tova gilubodana-ma ginalakayemu amine, Yaubada gaitoma moya'aina ana vesa'eya Keliso dibune fa'ina gavaimi givehimeya, mededemi ginafaisewa.

Yaubada Alu'aluwa Mahalina againe gisetagoda.

¹¹ Kadu'e, Yaubada ime Keliso buye ave'atutamo'aima-ma yana lokolokofou higa yana yo'o fa'ina giluwa'fama. E, boi tuwai-mo'ena yana vevai amine ime yana lokolokofou fa'ina givegide-vagahima. Bana'e gaitoma moya'aina givehimeyedi, ada Tauna yana inuba kadu yana vevai amine hilakayemu. ¹² Ada au yana inuba kadu yana vevai amine givegide-vagahima be Yaubada yana kikaiwabu yama dewa haghagina againe anayemaunena be kaliva hina'itadavadavana, ime Yaubada yana Tovegida Keliso yana hobu'ela fa'ina yama wavetumagana amaduvebutu alulauboda kalivai-mana. ¹³ Kadu omi'iyao meda anafaiweya laumamala Yaubada yana nuwanuwa vele'mo'ena fa'ina, higa ami kibababala ana Venuwa'ata Yamumuna

wanogalini-yo Keliso wavetumaganena. Keliso againe wavetumagana be Yaubada Alu'aluwa Mahalina againe gikibwami higa Alu'aluwana gi'iveninisena be givemagami, boi tuwaina giwonadabadaba vaita yana yo'ogaga agaidiya ginahawahegena amine. ¹⁴ Bana Alu'aluwa Mahalina ma vaita Yaubada yana kibwa ide agaideya amine, kadu kaliva kwamayoku gisetagona amine Yaubada Alu'aluwa Mahalina nuwahinagedeya gisena be gisetagoda, higa vaita gavaimi yana lokolokofou moya'aina ada du'u fa'ina giwonadabadaba, mededemi aimo ide agaideya ginasevefofona. Alu'aluwa Mahalina againe gisetagoda be higa aimo ide Tauna yana yo'ogaga ada tutuvehobu ginaluyabuni-yo ada aiyauga-vagata kanavai-'owona. Hidede amine Yaubada Alu'aluwa Mahalina againe gikibwada, kadu aimo ada tutuvehobu fa'ina gisetagoda be higa yana kikaiwabu kaliva hina'itadavadavana.

Folo give'o'ola be Keliso yana kikaiwabu

hinahalamane-hagihagiyena.

¹⁵⁻¹⁶ Tu mena Yaubada yana nuwadoga lakahina yana yo'ogaga agaideya fa'ina, tova moya'aina Yaubada againe gavesiule omi fa'imiya. Boi nagona yami vetumagana Kaiwabu Yesu againe kadu yami nuwanuwa hawahawahegana tovetumagana moya'aidi fa'idiya mena valeyami gamidinogalina againe, gavebutu omi fa'imiya gavesivesiule kadu keke gada'ilova, au yaku ve'o'ola againe tova

moya'aina ami egana gayakayahina. ¹⁷ Tova moya'aina gave'ove'o'ola be yada Kaiwabu Yesu Keliso yana Yaubada, higa Tamada Tokaiwabu-mo'a, tagami ginakifolefolena. Gave'ove'o'ola be Alu'aluwa Mahalina againe tagami ginakifolefolena kadu nuwami ginakiyauna be Yaubada ana halamana agaimiya ginakabu-fa'ila. ¹⁸⁻¹⁹ Kadu gave'o'ola be matami ginakivemahalina be higa Yaubada yana nuwanuwa omi fa'imiya wanahalamane-hagihagiyena. Yana nuwanuwa hidede amine. Sa'eyana wanahalamanena ma Yaubada givegidemi be aimo omi fa'imiya gavaimi yamuyamumu-'owogina ginagama fa'ina walulauboda. Kadu sa'eyana ma Yaubada gaveyao moya'aida yana kaliva mahamahalideyao, medema agaideya yana lokolokofou moya'aina ada du'u fa'ina giwonadabadaba, ada mena du'u-nadi ana kikaiwabu gavatubuga! Kadu Yaubada yana faiwala lakahina ide tovetumagana agaideya keke tamo gavadi againe kanahawaluvluveni. Mena yana faiwala lakahi-mo'ena, Keliso yana mididi-havagi againe giyemaunena ana tubuga amine, meda ide tovetumagana agaideya giyemayemaunena.

²⁰ E, Yaubada gifaiwala-mo'a be Keliso alikeya gisivemididina, Tauna i'atagine lobameya givehiyotona. ²¹ Wese lobama getane-mo'ane givetoga be gikaiwabu-mo'a. E, tokikaiwabu kadu tovehimeya kadu tofaiwala kadu kauveya tulina tulina gikaiwabuhege-mo'edi. Kadu

Bana ana egana lakahi-mo'ena, ada gaveyao moya'aidi adi egana kaliva hikikilahina, medema Yesu gikaiwabuhegedi, ada keke vaita hida tovagaga againe gidakaiwabuhegedi, au kadu aimo tova mulina buye'i. ²²⁻²³ Kadu Yaubada gaitoma moya'aina Keliso agevavane gisedi, ada Bana gaitoma moya'aina adi tovehimeya ma ide tovetumagana ada yo'o Bana anakaibe ada to'itave'avina fa'ina gisena, higa ide tovetumagana vaita Keliso wowona amine ada Bana'e Tauna ma u'uda. Ada ide vaita wowona amine ma u'uda Keliso kaluyabuna, tu Bana'e Tauna gaitoma moya'aina givemagadi, au lobama be babi be ide buye givemaga-mo'eda be giluyabuda.

2

Keliso buye kave'atutamo'aida-yo wayawaida ivaguna

kamimiyami.

¹ Tu omi'iyao ma tuwaina omi vaita to'alika amine. Yaubada yana vehimeya wadibutoyogena ada dewa koyona againe wahawahegemi fa'ina, alu'aluwami vaita ali'alikana. ² Mena dibutoyoga kadu dewa koyona ana eda againe tuwaina wanunudadana, hida babi ana nuwanuwa koyona amine wadewadewa, kadu Setani badi yafune lobama hinafane hinunudadana-ma adi tovehimeya yana abavehimeya againe wamiyami. Tova adamoya

bana kalivai-nadi yana nuwanuwa koyona todibutoyoga ase'asediya gifahafahana. ³ Boi tuwaina ide moya'aida badi todibutoyoga adi yo'o kalivadi. Dibuda koyona ana ayafana amine kadewadewa, ada gavaimi gavaimi wowoda o nuwada giludigadigaga, mededemi taudeyao yada nuwanuwa koyona againe kahawahawahegeda. Todibutoyoga moya'aidi yadi koyona fa'ina Yaubada yana ila'a guwana hinanuhagana. Ada tuwaina kadu ide dibuda koyona katubuga-ma kamiyami, ada vaita todibutoyoga moya'aidi amine Yaubada yana ila'a guwana kadanuhagana.

⁴⁻⁵ Atu Yaubada ma ana egana tohinekalikali. Yana nuwakabubu ide agaideya keke kabi'ona fa'ina, Keliso alikeya gisivemididina amine ide alu'aluwada ali'alikana gikiveyawayawana be Keliso buye wayawaida ivaguna kamimiyami. E, yada dewa koyona fa'ina alu'aluwada vaita ali'alikana amine kamiyami nonogana Yaubada yawaida ivaguna giveleda. Yaubada yana nuwadoga keke kanawona! Wa'ita, yana nuwadoga againe kibababala wanuhagana. ⁶ Ada ide Yesu Keliso buye kave'atutamo'aida-ma Bana'e buye gisivemididida, higa yawaida ivaguna giveleda be Yesu Keliso buye lobameya givehiyotoda. ⁷ Au hidede amine Yaubada ide Yesu Keliso buye gisivemididida ada givehiyotoda be higa aimo mulina tova keke ginahavaini yana nuwadoga lakahi-mo'ena ana iya'iyaya ide agaideya ginayemaunena. Ide gi'itanuwakabubuyeda be Yesu Keliso

fa'ideya gihawahegena fa'ina, yana nuwadoga gavatubuga! Au keke adafaiweya kanalagani. ⁸ Wanogali! Yaubada Tauna ginuwadogemi be omi wavetumaganeni-yo ami kibababala wanuhagana. Tu keke taumiyao nuwamiya vetumagana gidayemu, au Yaubada yami vetumagana givemi-yo wavetumaganena. ⁹ Kadu'e keke taumiyao yami vediwe fa'ina ami kibababala wadanuhagani. Au Yaubada givetumaganavelemi-yo ami kibababala wanuhagana be keke tamo hakwadi afaiweya tauni a egana unakilakahini unagayo, “Yaku vediwe fa'ina kibababala ganuhagana.” Keke amifaiweya hidede amine wanagahe. ¹⁰ Atu ide'eyao Bana Yaubada nimana ana iya'iyaya. Ide gavana anaga? Yaubada Yesu Keliso againe gibubuve'ivaguda be higa igibagiba kanaseseyemaunedi. Mena igibagiba ma boi tuwai-lokalokana Yaubada givevaiye-vagahina be higa igibagiba amine kananauna.

MiYuda kadu yo'o tulidiyao Keliso againe hivesa'eya.

¹¹ Tu omi keke miYuda tu yo'o tulidiyao agaidiya watubuyemu-ma yami miyami tuwaina wananuwa-nunauyena. MiYuda avewagami keke Yaubada yana yo'o, yana iya'iyaya keke wowodiya hidatomogolohini-ma kalivai-dina tu taumeyao avewagama ide Yaubada yana iya'iyaya wowodeya katomogolohina-ma kalivai-dana, higa iya'iyayai-nadi kaliva wowodiyagaga

gidadauda. ¹² Yami miyami tuwaina keke nuwami ginaulu. Tuwaina keke Keliso againe wadamiyave'avina, au wamiyavehaila. Kadu omi keke Yaubada yana yo'o miIsileli kalivai-dina, au omi tulimiyao. Boi tuwai-mo'ena Yaubada ime miIsileli yama yo'o givenuwadadanema be yana veyao againe giseusedi, higa ama kibababala fa'ina giwonadabedabema. Tu omi tulimiyao fa'ina, Yaubada keke hidede amine gidaveyaoyemi ada au hidei babiya wamiyami koyona, ase'ase mi ana abaluve'avina keke, yami Yaubada keke. ¹³ Boi tuwai-mo'ena omi tulimiyao vaita lauveya wadamiyavehaila amine. Keke Yaubada wadahalamaneni o ka'i yana yo'o agaidiya wadamiyave'avina. Atu tova adamoya Keliso dayagina gimadu fa'ina, Yaubada gitaimi be omi Bana liline kadu ime Bana yana yo'o lilimeya wayemu-yo Yesu Keliso buye wave'atutamo'aimi.

¹⁴⁻¹⁵ Keliso dayagina gimadu fa'ina Bana Tauna ada tokukuya, ada au ime miYuda kadu omi tulimiyao gi'ivesa'eyada. Tuwaina omi tulimiyao ala hawahawatana wakwaune wamiyami, ada ama vehimeya ama hawata Mosese ime miYuda givelema-ma keke wada'itave'avini fa'ina kavenivenibaina. Au hidede amine kavenibaina tu Keliso yana alika againe mena abavenibaina ana ala giyawelina. Bana wowona gihawahegeni-yo mena Mosese yana vehimeya gisevehaileda-ma gidabana be higa ime miYuda kadu omi yo'o tulimiyao kanaveyo'o sa'eyana. E, Keliso yana faisewa againe ide yo'o luhei ma yo'o sa'eyana ivaguna katubuyemu, ada au hidede amine

yada veyao gifaisewana. ¹⁶ Tuwaina ime'eyao be omi'iyao ma Yaubada nibaineyao tu Keliso kelose againe gi'alika be higa ide vaita yo'o sa'eyana amine gi'ivesa'eyada-yo Yaubada buye kanaveyao. Ada au ana kelose againe venibaina matatabuna giluve'alikana. ¹⁷ Kadu'e Keliso gi'ela be mena veyao gifaisewana-ma moya'aideyao agaideya gilumamalena. E, omi yo'o tulimiyao lauveya keke Yaubada liline wadamiyami-ma agaimiya veyao gilumamalena, kadu ime miYuda Yaubada liline amiyami-ma agaimiya veyao gilumamalena. ¹⁸ Bana Keliso yada eda gifaisewana be ada yo'o luhei adafaiweya Tamada matane kayemuyemu. Ime'eyao kadu omi'iyao Yaubada Alu'aluwana sa'eyanaga Tauna nuwahinagedeya gimimiyami-yo Tamada matane kayemuyemu. ¹⁹ Au hidede amine Keliso gi'ivesa'eyada fa'ina, omi keke tulimiyao vaita aimo hawahawala amine. Au Yaubada yana yo'ogaga agaidiya waluku be omi'iyao kadu ime'eyao yana kaliva mahamahalideyao buye kamimiyami.

Tovetumagana moya'aida vaita Yaubada yana manuwa

amine.

²⁰ Ide Yaubada yana yo'o ma kadu vaita Yaubada yana manuwa amine. Bana Yesu Keliso Tauna manuwa ana holili'abi. Ime afositolo kadu Yaubada bonana ana to'awatalatalaina ma manuwai-nadi ana ogola. Ada gaveyao moya'aimi Yaubada yana yo'ogaga kalivai-dina,

medema yana manuwa ana huyavila againe giyogomi. ²¹ Kadu Yaubada Bana Keliso holili'abini nadi againe ide huyavila give'etovefosedo be manuwa gilakalaka gilakalaka tu ide gaveyao Kaiwabu buye kave'atutamo'aida, medema vaita yana manuwa-tafalolo mahamahalina amine kayemu. ²² Ada kadu omi yo'o tulimiyao Kaiwabu buye wave'atutamo'aimi-ma Yaubada yana manuwa againe give'etohavihavimi be ide moya'aideyao vaita manuwa-mo'ena amine agaideya givemanuwa. E, Yaubada Alu'aluwana Tauna nuwahinagedeya gimimiyami fa'ina, Yaubada agaideya givemanuwa.

3

Yaubada yana vevai sevasevauyana Folo againe gihawavemogatalena.

¹ Tu omi tulimiyao kadu ime miYuda Yaubada yana manuwa againe se'eyaine give'etohavihavida fa'ina, iya Folo Yaubada againe gave'o'ola. Omi yo'o tulimiyao fa'imiya gahawahegeku fa'ina, deliya hiseku be iya Keliso yana kaliva yogoyogoniku gamimiyami. ² Ka'i valeyaku sa'eyana ahe wanogalina, higa Yaubada ginuwadogeku-yo givegideku be aku vehimeya omi yo'o tulimiyao ami kivetuvetunu fa'ina giveleku. ³⁻⁴ Yaubada yana vevai sevasevauyana keke tauku yaku nuwahuya againe gadahalamaneni, au Yaubada iya agaikuya gihawavemogatalena

be gahalamanena, yami leta againe kabi'ona ahe galukahihiyena amine. Ka'i bonaku wanahawana amine o, yaku nuwahuya mena vevai sevasevauyana Keliso fa'ina wanahalamanena. ⁵Yaubada mena yana vevai sevasevauyana badi kaliva boi tuwai-mo'ena aituha tulina tulina agaidiya himiyami-ma keke gidavehawaledi, tu tova adamoya ime yana afositolo kadu to'awatalatalaina higa yana kaliva mahamahalimeyao agaimeya gihawavemogatalena. ⁶Mena yana vevai sevasevauyana hidede amine. Yesu Keliso kibababala ana Venuwa'ata Yamumuna giyemaunena fa'ina, keke ime miYuda gagana ama du'u Yaubada yana lokolokofou moya'aina agaidiya anavaini, au kadu omi yo'o tulimiyao ami du'u ime ama du'u buye kanavaina. Kadu omi'iyao be ime'eyao yada yo'o au sa'eyana. Kadu gavaimi gavaimi hagihagina Yaubada giwonadabadaba, mededemi omi'iyao be ime'eyao Yesu Keliso buye kave'atutamoda ma ami du'u ama du'u buye kananuhagana.

Folo ana vehimeya yo'o tulidiyao adi kivetuveltunu fa'ina.

⁷Tu Yaubada givegideku be kibababala ana Venuwa'ata Yamumuna ana laumamala againe gavetofaisewa. E, Yaubada ginuwadogeku be gifaiwalaveleku fa'ina, mena vehimeyai-nadi ga'abi'abina. ⁸Iya'eku ma iya vaita kwamana kabiso-mo'eku amine Yaubada yana yo'o agaidiya. Iya kabiso-mo'eku nonogana

Yaubada ginuwadogeku-yo aku vehimeya giveleku be yana lokolokofou Keliso againe giyemaunena-ma omi keke miYuda tu yo'o tulimiyao agaimiya ganalulumamalena. Mena lokolokofou inubane be gina analauyabu ide keke adafaiweya kanahalamane-'owoni. ⁹ Yaubada aku vehimeya giveleku be kadu tomiyababi moya'aidi nuwadi ganakivemahalina be Yaubada yana vevai sevasevauyana ana faisewa fa'ina gavaimi gavaimi givevai ma hinahalamanena. Tuwai-lokalokana aituha a gavaiyehi kahegedi-ma agaidiya mena vevai sevasevauyana, Yaubada gaitoma moya'aina adi To'aibubuna ma Tauna nuwahinagene giduva'ima'ima. ¹⁰ Tuwai-mo'ena yana vevai sevasevauyana Yaubada nuwahinagene giduva'ima'ima be higa tova adamoya yana nuwahuya tulina tulina lobama ana tokikaiwabu kadu ana tofaiwala agaidiya gina'ivemogatalina. Hade'againa mena yana nuwahuya hina'itahalamaneni? Ide tovetumagana ada yo'o agaideya hina'itahalamanena. ¹¹ Ada yana nuwahuya ana ivemogatala au hidede amine gilakayemu be gavaimi givevai babi ana abavebutu aimo keke ana toveya, mededemi gigugai. Ada yana vevai Yesu Keliso yada Kaiwabu againe gilakayemu velema'ena. ¹² Yesu Keliso buye kave'atutamo'aida kadu Bana againe kavetumagana fa'ina, Yaubada matane yada wa'asevatu kadu yada wavetumagana adafaiweya kanayemuyemu. ¹³ Au gave'o'ola

agaimiya be omi fa'imiya aulolo tagiya ganuhagana fa'ina, nuwami keke ginavita. Au mena yaku ase'u'aulolo fa'ina, omi kaiwabu wanuhagana.

Folo miEfeso fa'idiya give'o'ola be Keliso yana nuwanuwa

hawahawahegana hina'ayaunena.

¹⁴⁻¹⁵ Tu Yaubada au hidede amine yana wanuwahuya givevai-ma ganuwa-nunauyena againe, Tamada matane ga'ibo'ula-mo'a. Bana'e yana yo'o kalivai-dina gaveyao lobameya himimiyami kadu gaveyao babiya kamimiyami amanadi, au matatabuda Bana'e Tamadai-nadi ana egana kawahina. ¹⁶⁻¹⁸ Gave'ove'o'ola be Bana Tokaiwabu-mo'a nuwana nuwanuwadogana amine nuwahnagemiya ginafaiwalavelemi. E, Alu'aluwa Mahalina nuwahnagemi ginakivetoyogina, kadu Keliso againe wanavetuvetumagana-yo ase'asemiya ginave'abaga. Kadu gave'o'ola be ai walamina gava gi'etodona kadu ogola gava gihobu-mo'a amine, omi nuwanuwa hawahawahegana againe wanafaiwala be higa omi kadu Yaubada yana yo'o moya'aidi buye Keliso yana nuwanuwa hawahawahegana gavalalafa gavatumuga, e gavatubuga ma wanahalamane-hagihagiyena. ¹⁹ E, gave'o'ola be mena Keliso yana nuwanuwa hawahawahegana inubane be gina ana abalauyabu ide keke adafaiweya kanahalamane-'owoni-ma ana halamana agaimiya ginatubuga,

ada au hidedemi Yaubada yana dodobodaboda againe ginavemaga-mo'emi.

²⁰ Tu Yaubada ana egana kanakilakahina. Yana faiwala nuwahinagedeya gififaisewa fa'ina, gavaimi gavaimi Bana againe kanave'o'ola o ka'i kananuwadadana wavemwamwalina, medema Bana anafaiweya ide fa'ideya ginagugaiyena, tu yana gugai yada ve'o'ola o ka'i yada nuwadadana wavemwamwalina gitubuhegena, gitubuhege-mo'ena. ²¹ Kadu'e Yaubada ana egana kanakilakahina. Au hidede amine yana kikaiwabu ginalakalaka. E, ide tovetumagana higa yana yo'o agaideya kadu Bana Yesu Keliso againe ginalakalaka be ginanunauwena tu ginaduva-vagata, tova inaga inaga keke ana abalauyabu. Ehe hidedemi.

4

Alu'aluwa Mahalina ide Keliso wowona gi'ivesa'eyada.

¹ Tu omi Yaubada gikovami-ma gana-gahevagadonemi. Iya deliya hiseku be Kaiwabu fa'ina yogoyogoniku gamimiyami-ma gagahegahevagadonemi be gava dewa Yaubada yana kaliva gilubodadi medede amine wanadewadewa. ² Tova moya'aina wananuwanuwahobu be kadu kaliva umaumadiyao amine wanahuluhuluva. Wana'atuvefa'ila, e yami wanuwak-abubu tobohiyamiyao wana'atuvefa'iledi. ³ Wana'itave'avimi be Alu'aluwa Mahalina gi'ivesa'eyami amine, yami nuwanuwa sa'eyana

againa wanamiyami be niwalova ana ala hinagene wanamiyami. ⁴ Ide Kaiwabu wowona au sa'eyanaga kadu Alu'aluwana sa'eyanaga. Meda anafaiweya gavadi aimo omi fa'imiya ginaga-ma fa'ina gikovami be walulauboda, medema abalulauboda sa'eyanaga. ⁵ Kadu yada Kaiwabu sa'eyanaga, yada abavetumagana sa'eyanaga, yada bafitaiso sa'eyanaga. ⁶ Kadu moya'aida yada Yaubada sa'eyanaga ada Tamada sa'eyanaga, Bana'e moya'aida givehimeyeda, yana faiwala moya'aida agaideya giffaisewa, Tauna moya'aida nuwahinagedeya gimimiyami.

Keliso yana abavetala gifolakena be ide wowona kanave'asevatu.

⁷ Moya'aida kavesa'eya tu Yaubada ide sa'eyana sa'eyana ginuwadogeda-yo ada vehimeya tulina tulina giveleda, ada medema Keliso yana abavetala Tauna gifolakena amine. ⁸ Meda Keliso yana folaka fa'ina Veyao Tuwaina ana buki gigahe gigahe,

Wese getane-mo'ane gilaka ana toveya nibaineyao agaidiya wai ginagona be yogoyogonidiyao ginauwedi, ada yana hawahega yana kaliva agaidiya gifolakena.

Hidede amine Yaubada buki-nadi againe gigahe.

⁹ Yana gahe sa'eyana “gilaka” ma, gavaimi ana nuwanuwa? Ana nuwanuwa hidede amine. Nagona babi gava dibune gihobu'ela. ¹⁰ Ada Bana gihobu'ela Kalivai-nadi wese lobama getane-mo'ane gilaka be higa lobama be babi

matatabudi Tauna againe ginavemaga-'lowodi.
¹¹ Ada yana abavetala yana yo'o agaidiya gifolakena-ma hidede amine. Tufoidi adi vehimeya ma afositolo yadi faisewa, tufoidi Yaubada yana venuwa'ata gitunevehabalutugidi-ma hina'awatalatalainena, tufoidi kibababala ana venuwa'ata hinalumamale-dadanena. Ada tufoidi adi vehimeya ma Yaubada yana sifi adi to'itave'avina kadu adi tovehawala.
¹² Keliso vehimeya medede amine gifolakena be higa mena kalivai-dina yadi faisewa againe Yaubada yana yo'ogaga hina'ihagihagiyeda-yo tovetumagana moya'aida Keliso yana faisewa againe kana'idibumuhiga, ada au Keliso wowona ginatubutubuga. ¹³ Au hidedemi Keliso wowona ginatubutubuga tu ide yana kaliva yana vevine moya'aida yada vetumagana againe kadu Yaubada Natuna ana halamana againe kananuwanuwa sa'eyana be kanave'asevatu. E, Bana Keliso nuwanuwa yamumunaga againe gimaga-mo'a be give'asevatu amine, ide yana nuwanuwa yamumunaga againe kanamaga-mo'a be kanave'asevatu.

¹⁴ Ka'i mededemi kanave'asevatu amine, aimo keke vaita we'owe'o yadi nuwanuwa tulina tulina amine kanamiyami. Lefo lakahina waka giluluvilavilana wa'amine wa'amine o ka'i bolimana ai lukumina gitafitafivilavilana amine, keke vehawala tulina tulina wa'amine wa'amine kanamulimuliyeni be kaliva aikaunuwanuwadiyao yadi bonayafayafa againe hinanuwa'abiyeda be higa eda tunutunugina kanahegeni. ¹⁵ Keke medede amine

kana'abinuwanuwa, au yada wanuwanuwa hawahawahegana nuwanuwa velemono'ena kanagahegaheyeni-yo au yada dewa moya'aina againe Keliso ana ita'ita amine kanalakalakata, higa Bana u'uda. ¹⁶ Ada Bana u'uda fa'ina, ide sa'eyana sa'eyana vaita waloga amine Keliso wowona againe kave'etohavihavida, ada ide waloga sa'eyana sa'eyana yada faiwala Keliso u'uda againe gi'ela'ela be moya'aida buye kave'aveluveluga. Kadu ka'i sa'eyana sa'eyana yada faisewa tulina tulina ka'ita'itave'avina amine, wowona matatabuna gitubutubuga gitubutubuga tu ide wowonainadi buye kave'ahawahawahega-yo taudeyao kakivetubugida be kave'asevatu.

Keke tomiya-kawokawowo amine wanahuluhuluva, au Keliso

yana kaliva mahamahalimiyao amine wanadewadewa.

¹⁷⁻¹⁸ Tu omi Keliso wowona fa'ina, iya Kaiwabu yana kaliva omi agaimiya Bana matane gana-gahe. Badi Yaubada keke hidahalamaneni-ma amine omi keke wanahuluhuluva. Badi gaitomakawowo fa'ina tova moya'aina hinuwanuwa, ada tagadi hi'ivekuluna fa'ina Yaubada hifaniyeni-yo yawai-vagata Bana givetalaiyena-ma keke hidahalamaneni. Au tulidiyao himiyamiyavehaila, ada nuwadi gi'uyuyu-mo'a. ¹⁹ Nuwadi give-waba be wowomumu ana ayauna keke hidahalamaneni fa'ina, nuwanuwa aya'ayafanina againe

hivetalaiyedi be yamadada tulina tulina hihuluvidi, keke ma'ita hida'ilova.

²⁰ Tu omi'iyao ma Keliso againe wasikulu tu ana halamana keke mena dewai-nadi koyomo'ena amine wadavaini. ²¹ Omi velemodi Keliso wa'itahalamanena ada Bana yana yo'o agaidiya waluku-yo vehawala nuwanuwa velemo'ena Yesu giyemaunena-ma amine wanogalina. ²²⁻²⁴ Ada vehawala hidede amine wanogalina. Tuwaina aimo keke Keliso againe wadavetumagana ana toveya, taumiyao nuwami ana nuwanuwa koyona dibune wamiyami. Yami nuwalauvadiga gilolomi be wanuwadigadigaga tu gikikivekoyomi. Atu kuvi tubuna gi'afuwana be bavagu againe gina amine, omi tubumi wanahegena be nuwami ivaguna wanavelakavina. E, wanahawahegemi be Yaubada ase'ase mi kadu nuwami matatabuna ginakive'ivaguna. Ada mena nuwami ivaguna Yaubada Tauna ana ita'ita yegayegana kadu mahamahalina velemo'ena amine gibubuna be Bana amine wanahuluhuluva.

²⁵ Tu nuwami ivaguna Keliso amine wanahuluhuluva fa'ina, ve'alololo matatabuna wanavenikohiyena. Moya'aida yo'o sa'eyana kalivai-dina fa'ina, omi sa'eyana sa'eyana tobohiyamiyao agaidiya wanagahe velemo'ena. ²⁶ Dewa koyona fa'ina wananuwakoyo tu keke wananunauweni be taumiyao wanakoyo. Yami nuwakoyo keke wananunauweni mala ginabogi, au ginamaduhavaina. ²⁷ Fa'ina keke taumiyao ami wanafali wanayauni be Setani ginaluku. ²⁸ Hai kaliva gikikai'afu, medema kai'afu

gina'ilovena, au ginavebutu ginafifaisewa. E, tauna nimane ginafaisewa haghagina be higa badi koyokoyo tamo gavadi againe anafaiweya ginanuwakabubuyedi.

²⁹ Kadu wonakoyokoyo keke-mo'a awamiya ginayemu. Au gahe yamumunaga wanayakayahina, ada gavadi gavadi tobohiyamiyao gilubodadi, medema wanagahegaheyena be wanakivetoyogidi kadu wana'ihagihagiyedi. ³⁰ Ada keke Yaubada

Alu'aluwana Mahamahalina ase'u'aulolo wanaveleni. Yaubada Alu'aluwa Mahalina againe gikibwami be higa aimo tova mulina tutuehobu ana toveya, ami aiyauga-vagata wanavai-'owona. ³¹ Nuwakoyove'ine agodadaga ila'a wanavenikohiyena. Auwe ve'afaifaina kadu veyaina. Tobohiyamiyao adi kivekoyo ana nuwanuwa matatabuna wanavekwaulaugena.

³² Au buye wanave'anuwakabubu kadu buye wanave'ahinekalikali. Ada Yaubada Keliso fa'ine yami koyona givenuwauluyena amine, meda omi tobohiyamiyao yadi koyona wanavenuwauluyena.

5

Dewa uyu'uyuyuna wanavekwaulaugena be mahalina againe

wanamiyami.

¹ Tu Yaubada yami dewa koyona
givenuwauluyena amine omi Bana'e

natu'ase'aseneyao fa'ina, au Tamami wanave'uve'u'ulena. ² Bana Keliso yana nuwanuwa ide agaideya gisena be ide fa'ideya yawaina gihawahegena amine, meda tova moya'aina tobohiyamiyao fa'idiya wanahawahawahegemi. Kevakeva hikabuna be magana yamumuna gilakalaka-yo Yaubada giyauna-ma amine, mena Keliso yana hawahega ide fa'ideya au abaveyao haghagina Yaubada nuwana gikiveyamumuna amanadi.

³ Tu omi'iyao ma Yaubada yana kaliva mahamahalimiyao fa'ina, udo tulina tulina o ka'i nuwanuwa bwanebwane nena o ka'i italuvadiga keke-mo'a wanahuluvani, tu kadu keke ma'ita wanalukahihiyeni. Omi kaliva mahamahalimiyao fa'ina, dewai-dina keke-mo'a gidalubodami. ⁴ Kadu keke luhabohabola o ka'i gahe kabakabaleyana o ka'i wonakoyokoyo wanayakayahini. Medema tovetumagana keke gidalubodami. Au yami gahe ma Yaubada againe wanavesivesiule. ⁵ Gaitoma sa'eyana wahalamane-hagihagiyena, higa hai kaliva to'udo o ka'i yamayamadana o ka'i ita'italuvadigana, ame bana hidevama italuvadiga vaita nuwanuwa tulina tulina Yaubada yana abaga ase'ase miya gidalemani. E, hai kaliva mededemi gihuluhuluva, medema keke-mo'a ana du'u Keliso be Yaubada yadi abavehimeya againe ginavaini. ⁶ Wana'itave'avimi be keke tamo hakwadi gahe-kawowo againe ginabonayafeyafemi, higa vaita mena dewai-dina au keke koyona. Mena dewai-dina fa'ina Yaubada yana vehimeya ana

todibutoyoga yana ila'a guwana hinanuhagana.
7 Hidema fa'ina keke badi todibutoyoga wanavetobohiyanedi.

8-9 Boi tuwaina omi uyuyu ana kaliva, tu tova adamoya Kaiwabu buye wave'atutamo'aimi fa'ina omi mahalina ana kaliva. Au mahalina ana kaliva amine wanadewadewa. Fa'ina mahalina guwana au dewa hagihagina, huluva yegayegana, kadu nuwanuwa velema'ena. 10 Ada au wanalele be gavadi gavadi yamumuna Kaiwabu matane ma wanahalamanena. 11 Uyuyu ana dewa wanavenikohiyena. Mena dewai-dina guwana keke, au yami mahalina againe wanakivemogatalina be moya'aidi hinahalamanena mena dewai-dina adi ita koyona. 12 Gavadi gavadi isevasevauya againe hidewedewena medema koyo-mo'ena, ada ka'i tamo hakwadi gidalukahihiyena, au kadawowomumu lakahina. 13-14 Atu ka'i yadi dewa Kaiwabu yana mahalina againe wanakivemogatalina amine o, mena dewai-dina au adi ita koyo-mo'ena ma kabu'avane ginayemu. Fa'ina ka'i Kaiwabu yana mahalina kaliva yada dewa ginatuvemahalina, au dewa inubana ka'i koyona o yamumuna kabu'avane ginayemu. Medema fa'ina kweli sa'eyana gigahe gigayo, O u'enonuwaulu-ma umidi, au alikaya unamididi-havagi be Keliso ginatuvemahali.

Mahalina ana kaliva hidemi hidemi wanadewadewa.

15 Tu omi mahalina ana kaliva yami dewa wana'itave'avina, wana'itave'avi-mo'ena. Keke fanifanidiyao amine wanadewadewa, au kaliva nuwanuwahuyamiyao amine wanahuluhuluva. 16 Hida tova au tova koyona fa'ina, keke wanamiya-kawowo. Au gavadi gavadi hagi Hagina amifaiweya wanagugaiyena, medema againe wanahawahegemi. 17 Fa'ina keke wanavekwavakwava, au tova tova wanalele be gavaimi gavaimi Kaiwabu nuwanuwana omi wanadewadewa, medemi wanadewa. 18 Gufa laulaugina keke wanayu-fa'ila be u'umi ginakoyo, fa'ina mena gufa ana yu-fa'ila againe yami miya matatabuna wanakivekoyona. Au Alu'aluwa Mahalina wanayuyuyena be ginavemagami. 19 Alu'aluwa Mahalina ginavemagami-yo yami ve'agahegahe againe kweli tulina tulina wanayakayahina, higa same Veyao Tuwaina ana bukiya gidadauda amanadi, kadu kweli Yaubada ana hawadavadava fa'ina kaliva hi'etoladina-ma, kadu kweli Alu'aluwa Mahalina gina'alavelevelemi-ma wanakwelikweliyena be yami wavemwamwala alu'aluwamiya Kaiwabu wanakwelidavadavana. 20 Kadu gaitoma sa'eyana sa'eyana fa'ina Yaubada Tamada againe yada Kaiwabu Yesu Keliso ana eganeya wanavesivesiule tova moya'aina.

Kaliva vevine naginagidiyao adi vehimeya fa'ina.

21 Tu Keliso wave'amohimohinena fa'ina, taumiyao buye wanave'abona'abi'abi.

22 Omi vevine nagingimiyao moganemiyao wanawowomumuyedi be bonadi wana'abi'abina, higa vaita Kaiwabu wadawowomumuyeni be bonana wada'abi'abini. 23 Ide tovetumagana yada yo'o au Keliso wowona ada Bana'e u'uda. Bana Keliso ide yana yo'o u'uda amine, bana kaliva vavinena u'udi. Atu Keliso kadu wowona ada tolugolagola. 24 Ada au ide Keliso yana yo'o Bana'e kawowomumuyena be bonana ka'abi'abina amine, omi vevine moganemiyao agaidiya wanawowomumu be gavaimi gavaimi hinavehimeyemi, medemi bonadi wana'abi'abina.

25 Tu omi kaliva nagingimiyao ma vavinemiyao wanagidi be badi fa'idiya wahawahegemi. Meda anafaiweya Bana Keliso yana yo'o ginagida be ide fa'ideya gihawahegena. Au Bana Keliso yana nuwanuwa yana yo'o agaideya gisena be yawaina fa'ideya gihawahegena amine, omi yami nuwanuwa vavinemiyao agaidiya wanaseusena be badi fa'idiya wanahawahawahegemi. 26 E, Keliso yana yo'o fa'ideya yawaina gihawahegena be higa bonana ana gufa againe ase'aseda ginakolaniyo ginakiveyeyegada be mahamahalideyao Yaubada matane kanamiyami. 27 Kaliva nuwanuwana vavinena adi ita yamumunaga keke tamo wowodi ana sili o ana atavatava o ana bwaya amine ginaluwafadi, meda anafaiweya Keliso nuwanuwana ide tovetumagana ada yo'o, higa vaita vavinena amine, ada ita mahamahalina kadu yamumunaga Tauna fa'ine ginaluwafada. 28 Meda anafaiweya omi

kaliva yami nuwanuwa hawahawahegana vavinemiyao agaidiya wanaseusena. Taumiyao wowomi wanuwenuwena be wa'ita'itave'avina amine, vavinemiyao adi itave'avina fa'ina wananuwanuwa-hagihagi. Hai kaliva vavinena ginuwenuwedi be gi'ita'itave'avid, medema tauna wowona ginuwenuwena be gi'ita'itave'avina, fa'ina vavinena au bana wowona. ²⁹⁻³⁰ Wa'ita, keke tamo kaliva tauna wowona gidavenikohiyeni. Au wowona givave'ana kadu gi'ita'itave'avina. Meda anafaiweya Keliso Tauna wowona higa ide yana yo'o givave'ada kadu gi'ita'itave'avida, fa'ina ide Bana wowona talaina tulina tulina. ³¹ Mena kaliva wowona higa vavinena adi itave'avina ana nuwanuwa fa'ina, Yaubada Veyao Tuwaina ana bukiya gigahe gigayo,

Kwamayoku kaliva lulune gabubuna fa'ina,

bana kaliva ma hinana tamana ginahegedi tu

ginavemanuwa-damana be vavinena againe

ginamiyave'avina, ada hinavewowotamo'ai.

Hidede amine Yaubada yana gahe. ³² Au nuwanuwa lakahi-mo'ena mena gahe-nadi hinagene sevasevauyana gidadauda, hida iya ganuwanuwa vaita Bana Keliso kadu ide tovetumagana yana yo'o yada vewowotamo'ai ana abaluvefota. ³³ Ada au omi kaliva moya'aimi sa'eyana sa'eyana tauni unuwenuwe be u'ita'itave'avi amine, meda vavine unuwenuwedi be una'ita'itave'avid. Kadu omi vevine sa'eyana sa'eyana moganemi

wanave'amohimohinena.

6

Natumeyao be tamameyao ada vehimeya.

¹ Omi we'owe'o Kaiwabu yana yo'o unumai-nadi, tamamiyao hinamiyao bonadi wana'abina, fa'ina mena vehimeya gilubodami. ²⁻³ Yaubada givehimeya gigayo, Tama be hina unave'amohimohinedi, ada au unamiyami hagihagina kadu babiya unamiya yawaini tunugina. Au vehimeya teni agaidiya medema vehimeya nagona waguwana.

⁴ Omi tamadiyao, keke natumiyao wanamiyagahedi be agodadaga againe aimo wana'ive'ago'ugadi. Au yadi miya hagihagina fa'ina yami wahinekalikali wanadakeyedi be wanakivetunudi Kaiwabu yana gahe amine.

Agetogamomo kadu tovehimeyamomo adi vehimeya.

⁵ Omi tove'agetoga, badi babi ana tovehimeya agaidiya wave'agetoga-ma wana'idibumuhigedi. Yami wamatauta kadu yami wa'asehawahega wanave'amohimohinedi higa vaita Keliso wada'idibumuhigeni.

⁶ Wana'idibumuhigedi keke vaita matadiyagaga be higa hinahawaveyamumuyemi, au vaita Keliso ana ve'agetoga amine tova moya'aina yami wa'asehawahega wanafifaisewa, higa vaita Yaubada yana nuwanuwa wada'ita'itave'avini.

⁷ Yami wavemwamwala wanafifaisewa keke vaita kalivagaga fa'idiya wadafifaisewa, au Tovehimeya getane buye'i fa'ina. ⁸ E, wananuwanuwa vaita Tovehimeya getane fa'ine wadafifaisewa, fa'ina Bana'e kaliva sa'eyana sa'eyana gavadi gavadi faisewa yamumuna gigana, medema fatana hagihagina ginavelena. Ka'i agetoga o ka'i keke agetoga, au laufata ginavaina.

⁹ Tu omi tovehimeya ma meda anafaiweya ami agetoga agaidiya wana'ihagihagi. Keke wanakivematauhidi, fa'ina adi Tovehimeya kadu ami Tovehimeya lobameya au sa'eyanaga, ada ka'i tovehimeya o ka'i agetoga digo ami ihagihagi leleleya.

Setani yana yo'o buye'i agaidiya kalulugaviya.

¹⁰ Tu tobohiyakweyao, yaku gahe sa'eya-mo'ena. Kaiwabu buye wave'atutamo'aimi-yo Tauna yana faiwala lakahina againe wanafifaiwala. ¹¹ Gaviya ana vaigau matatabuna Yaubada givilemi-ma wana'osena be higa Setani yana alaveyaveyafa amifaiweya wanamidihegena. ¹² Fa'ina keke tomiyababi agaidiya kadave'alaliyaliya. Au Setani yana yo'o higa alu'aluwa bwanebwanenediyao tulidi tulidi lobama hinafane himimiyami-ma agaidiya kave'alaliyaliya. E, uyuyu ana tokikaiwabu agaidiya kadu ana tovehimeya ana tofaiwala agaidiya kave'alaliyaliya, badi yafuyafunediyo hida babi uyuyuyuna againe himimiyami unumai-dina. ¹³ Setani

yana yo'o buye kalulugaviya fa'ina, gaviya ana vaigau matatabuna Yaubada givilemi-ma wana'osena be higa tova koyona ginayemu-yo au amifaiweya Setani wanaluveyewana, ada wanamunumununa wanamunumununa tu keke wanavihila, au wanamididi-mo'a.

¹⁴ Au wanamididi-vagata. Nuwanuwa velemo'ena vaita gaiyona amine dobomiya wanahifodonena. Dewa yegayegana medema vaita manawami ana abaseboda amine wanasebodami. ¹⁵ Kadu veyao ana Venuwa'ata Yamumuna againe wana'ihagihagiyemi vaita ami ageyafayafa wana'oseni-yo agemi fa'afa'ana wanalulugaviya. ¹⁶ Mena vaigau moya'aina wana'osena kadu vetumagana vaita yami veve amine wana'abina. Yami vetumagana ana veve againe giyo wa'i'ala'alahina moya'aina kaliva koyona omi agaimiya ginatugagena-ma amifaiweya wanaluvekwe'una. ¹⁷ Ami kibababala Keliso givilemi-ma wanavaina be vaita gaviya ana kedukedu amine wana'osena. Kadu Alu'aluwa Mahalina yana fetu higa Yaubada bonana wanavaina. ¹⁸ Alu'aluwa Mahalina yana faiwaleya tova moya'aina wanave'ove'o'ola. E, yami awalulau'u be tagivedadaga tulina tulina Yaubada againe wanaseusena. Mena inuba fa'ina wanavanevanenega kadu wana'atu'atuvefa'ila be Yaubada yana yo'o moya'aidi fa'idiya wanave'ove'o'ola tova moya'aina.

¹⁹ Kadu'e, iya fa'ikuya wanave'o'ola be ganamidi ganalulumamala ana toveya, Yaubada yana gahe ginaveleku be yaku wa'asevatu ganalukahihi, kibababala ana

Venuwa'ata Yamumuna ana nuwanuwa
 sevasevauyana ganahawavemogatalena.
²⁰Yaubada loseyanina iya gi'iveniniseku be yana
 Venuwa'ata Yamumuna ganalulumamalena atu
 adamoya yogoyogoniku gamimiyami. Fa'ikuya
 wanave'o'ola be gavaimi gilubodaku, mededemi
 yaku wa'asevatu ganahawavemogatalena.

Folo yana lukafoi.

²¹Kafoi tobohiyakweyao, nuwanuwaku
 valeyaku o gavaimi aku ayauna wanahala-
 manena. Tobohiyanuwaku Tikiko aku valeya
 matatabuna ginavenuwa'atami. Bana'e Kaiwabu
 yana faisewa againe kaliva dibudibumuhigina.
²²Hidema ana inuba iya bana ga'iveninisena be
 gavaimi ama valeya ginavenuwa'atami, kadu
 ase'asemi ginakivevatuna.

²³Yaubada Tamada kadu Kaiwabu Yesu
 Keliso omi tobohiyameyao moya'aimi ase'asemi
 ginakiveniwalovina, kadu yami vetumagana
 nuwakabubu buye ginavelemi. ²⁴Gaveyao
 moya'aidi Kaiwabu Yesu Keliso againe yadi
 nuwanuwa hise-vagahina keke yawaidi
 hina'ani, medema Yaubada yana nuwadoga
 hinanuhagana.

(Iya Folo bonaku.)

**YAUBADA BONANA VEYAO IVAGUNA Bona
Iduna**

**The New Testament in the Iduna Language of Papua
New Guinea**

Nupela Testamen long tokples Iduna long Niugini

copyright © 1983, 2003 Wycliffe Bible Translators, Inc.

Language: Iduna

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-26

PDF generated using Haiola and XeLaTeX on 11 Nov 2022 from source files
dated 22 Nov 2019

73458371-ad55-5c77-8b6b-5eca8d58f667